



Komunikadu Imprensa
06 Dezembru 2021
Parlamentu Nasionál

JSMP apresia ho serbisu Komisaun A PN ne'ebé konsege finaliza ona Lei Estatutu Ministériu Públiku iha diskusaun no aprovasaun especialidade

Komisaun A Parlamentu Nasionál, iha 24 Novembru 2021 liuhusi diskusaun no votasaun iha especialidade konsege finaliza ona Proposta Lei Nú.24/V(3^a) kona-ba Estatutu Majistratura Ministériu Públiku hodi revoga Lei vijente ne'ebé durante ne'e guia Ministériu Públiku nia serbisu.

Estrutura Estatutu ne'e rasik kompostu husi Artigu hamutuk 310 ne'ebé fahe ba parte tolu mak hansen iha parte I ko'alia kona-ba Ministériu Públiku nia estrutura, funsaun no rejime intervensaun sira inklui kona-ba órgaun majistratura Ministériu Públiku. Entretantu parte II kona-ba majistratura Ministériu Públiku nia Kompozisaun, Funsan no Estatutu inklui dever, direitu no incompatibilidade, avaliasaun, aposentsaun, jubilasaun, sesaun no suspensaun ba nia funsaun nune'e mós kona-ba nia antiguidade no nia disponibilidade ho nia rejime dixiplinár sira.

Entretantu iha parte III define kona-ba dispozisaun tranzitóriu no finál kona-ba aplikasaun lei ne'e nia efeitu bainhira tama iha vigór.

“JSMP apresia tebes ho serbisu Komisaun A hodi finaliza lei ne'e ho lalais tuir kalendáriu Komisaun nian iha diskusaun no aprovasaun especialidade hodi apresenta ba Meja Parlamentu Nasionál atu bele halo votasaun iha finál globál. Lei ida ne'e mós nu'udar pakote ida husi lei sira ba reforma setór judisiáriu ne'ebé sai prioridade ba Governu Konstitusionál VIII nian antes termina sira nia mandatu,” dehan Diretora ezeutiva JSMP Ana Paula Marçal.

JSMP hein katak ho lei ida ne'e bele responde ba preokupasaun majistratura Ministériu Públiku nia serbisu ne'ebé representa Estadu hodi ezerse asaun penál, aseguza defeza ba menór, auzente no inkapáz sira no defende legalidade demokrátika no mós promove lei nia kumprimentu sira.

Iha parte seluk, JSMP rekomenda ba deputadu sira atu diskute filafali ho kle'an asuntu sira ne'ebé mak JSMP mós preokupa hanesan paralelizmu iha relasaun ho majistratura judisiál, representasaun Ministériu Públiku, regalia sira no estabesimentu Komisaun Rekrutamentu no selesaun antes aprova iha finál globál.

JSMP mós apresia ho iniciativa Komisaun A iha prosesu diskusaun ba lei ne'e tanba sempre envolve mós entidade relevante sira hanesan Tribunál, Ministériu Públiku, Defensória Públiku, Polísia Sientífiku Investigasaun Kriminál no JSMP iha audénsia públiku antes tama ba diskusaun especialidade.

Iha diskusaun espesialidade hetan mós partisipasaun másimu husi Tribunál, Ministériu Públiku no Defensória Públiku ho Ministériu Justisa nu'udar proponente ba proposta ne'e no hein katak Komisaun Espesializada Permanente sira iha PN bele uza mekanizmu ida ne'e hodi enkoraja públiku atu partisipa iha prosesu lejislasaun.

Atu hetan informasaun liutan favor kontaktu direktamente:

Ana Paula Marçal
Diretora Ezekutiva JSMP
Telefone: 3323883
www.jsmp.tl

Rua Beco Lakateu, Aldeia Manufuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77040735

www.jsmp.tl

ana@jsmp.tl

Facebook: www.facebook.com/timorleste.jsmp

Twitter: @JSMPtl